

漁 歌

浙音釋字琴譜：（明弘治四年前即 1491 年前）

第一段 瀟湘水雲

家住吳楚大江頭，浪花中，一葉扁舟。輕畫槳，南北遨遊，無累的那亦無憂，老天有意難留。去年今日，蘭江渡口，今日湘浦也巴丘，任消愁。有那箇青箬笠，綠蓑衣，碧莎紅蓼白蘋洲。絲綸短放却長收，忘機也友愛鳧鷗，日月悠悠，水雲浮浮。湘江湘江兩岸秋，畫橋綠水也通天流。落霞孤鶩，宿雨方初收。睡駒駒，夢悠悠，遠迷蝴蝶到莊周。

第二段 秋江如練

一天秋，那粧點出那鑑湖光，耽那風月駕舟航。如油澄清綠水，帶連彭蠡，近接着荆湘。愛那蓴鱸江，好風涼，紅塵無累總相忘，烟水也白茫茫。棹破江心浪，扁舟蕩漾，明明皓月浸銀潢。綸杆高舞影，鈎餌細分香。渭水功名周呂望，富春山漢嚴光。

第三段 洞庭秋思

海天萬頃波光浮，冰壺玉宇澄清秋，自自在在中流，不繫扁舟。風與露，任蕭條，接長綸綫，直却那金鈎。想他無心背漢，有意匡周，世事無憑，功名兩字，一似浮漚。

第四段 楚湘烟波

漁歌悠悠，楚水湘波，烟靄靄，宿雨初過。見風帆的那賈客忙，來往爭逐去如梭。誰如漁夫漁婦，暢此中流，慢棹輕歌。無榮無辱，無福無禍。儒也無過，道也無過，儒釋道總無過，百家衆技總總無過，權謀術數遠更無過，無過。

第五段 天闢明明

天磨雲影，好風那寂靜，皓月明明，玉露冷冷。輸彼漁翁，鼓柁輕輕。天清地寧，長唉一聲。一目中舒，義氣浩浩，小吞那巴蜀，空闊那洞庭。漁歌有狀無形，托他一箇討魚名，投閑養性怡情。

第六段 漁歌互答

問彼漁郎，風波險處舟航，濤浪相舂撞，相舂撞，思量怎的去隄防。那漁郎抵掌，嘻嘻向我行言其當。死生也有由天命，知我背却無方。欸乃歌，和聲長，山隱映，那水微茫。纔聽大郎歌，又聽小郎相倡和，清濁的那和滄浪。聲隨流水，轉壑悠揚，濯纓濯纓，濯足濯足和滄浪。響過你那行雲天蕩蕩，翩翩鷗鷺，驚起寒沙亂飛張。扁舟落日動鳴榔，魚吹浪，天昏黃。

第七段 嚶嚶鳴雁

蘋洲蘆岸蓼汀，漁驚那鴻雁鳴，聽嚶嚶聲度那淒清。漁翁鴻雁也，兩相友愛，爲弟爲兄，念羣吊影忘形，吊影忘形。欸乃的那聲相應，聽嚶嚶和聲相應。

第八段 夜傍西巖

漁翁夜傍你那西巖宿，宿，酒醒無眠也和歌曲。漏深歌轉兮聲斷續，好夢呵從吉。紅日呵三竿足，睡也那不足，樂也那不足。

第九段 漁人晚唱

出桃花灘，離芳草渡，過蘆花洲，繫楊柳埠。聽漁歌，夫唱婦相助，氣應聲相互。落日西斜，長天欲暮，月照蘆花，的那無寐還無

寤。江天烟雨，黃昏綠樹，今夜也不知在那何處住。十里長灘，接着那野墅，聲逐西風，的那悠揚遠度，離愁如訴，會合無憑如訴，成歡成怒。遙想你那風月長春院，古樂府，吹也唱也，響遏繞梁聲，何足數，何足數。

第十段 醉臥蘆花

漁翁得魚沽酒斜陽城，漁翁力拳沽酒輸還贏。醒還醉，醉還醒，蘆花月明，悠悠楊柳風清，高枕臥，有餘情。長呼吼，魚龍驚，更深夢寐無成。看他無拘無束，放浪放浪一身輕，向那閑中臥，老此昇平。

第十一段 蓬窗夜雨

雨聲不息，一更不息，二更不息，三更不息，四更不息，五更點點滴滴。蓬窗內，兒與媳，蘆花毯，無愁濕，好良宵，誰愛惜。水國兮，江鄉兮，風浪屏踪跡。三唱雞聲天又白，尙愁天色。

第十二段 梧桐葉落

金井梧桐葉飄，風颼颼，涼瀟瀟，任彼那漁舟樂得逍遙。月光浮，夜迢迢，寂寥，寂寥。敲直釣魚鈎，烟水海天秋。抱着那七絃琴，悠悠輕奏，秋風調，怡情風月江頭。

第十三段 曉汲湘江

輞川鷗鷺齊飛，吳江鱸鱖齊肥，湘江汲炊行竈。曉烟浮，楊柳模糊抹翠。細劈江東魚鱠，醉飽陶陶穩睡。蘆荻灘頭，舟橫的那網晒綸收，逍遙物外。

第十四段 漁舟盪槳

啞啞啞啞，的那櫓聲和烟輕，撥進邁前程。江天空洞浪初平，遙看盪槳，行歌慢和輕，深撥棹，作揖而行。月白風清，高竿又向柳陰撐，怕驚散鷗鳥盟，遙思今夜宿江城。

第十五段 寒江撒網

江岸寒風輕刮，霜凜冽，看漁人舉網輕撒。發撒，扎撒，網收魚撥刺。槳催呵逐步牽從前軋，斷續也聲啞啞。兩手輕輕的那提挈，水底輕撈月，風中輕捉雪。網收網撒，魚鱖呵撥刺，網收呵網撒。

第十六段 日出烟消

黑甜夢醒時，你那紅日曉，晴天四野烟消，烟消。從他網疏網密，無與有，任教漏却吞舟。恣遨遊，萍蹤梗跡，的那亂飄飄，浪花浮，只托個打魚名的那去爲由。

第十七段 欸乃一聲

那釣魚人原是青雲客，人不識。罷絲綸，懶去釣王國，怕道遇你那周西伯。

第十八段 山高水長

山高水長，輸他笑傲徜徉。屏屠龍手段，托個討魚名，林泉晦跡韜光。